

Incumbensa Caduff concernent il sustegn per persunas che assistan e tgiran lur confamigliars

Il december 2014 ha il cussegl federal publitgà in rapport davart la situaziun da las persunas che assistan e tgiran lur confamigliars. En quest rapport vegn analisada la situaziun en Svizra davart il tema numnà, vegn erui il basegn d'agir e vegnan elavuradas propostas da soluziun. Il basegn d'agir vegn mussà tant per la confederaziun, per ils chantuns sco er per las vischnancas.

Meglras cundiziuns da viver sco er progress medicinal e terapeutics han prolungà ils ultims decennis la durada probabla da la vita. Bleras malsognas ch'eran pli baud bunamain adina mortalas pon oz vegnir surventschidas. Tras quest svilup resulta in basegn d'assistenza e da tgira pli e pli grond. Il basegn supplementar d'assistenza e da tgira na po strusch vegnir cuvri mo tras la tgira professiunala ed instituziunala. Per quai na stattan a disposiziun ni las persunas spezializadas necessarias ni ils meds finansials. L'Observatori svizzer da sanadad Obsan prognostitgescha fin l'onn 2020 in basegn da persunal supplementar da circa 18 000 persunas spezializadas (13 pertschient) en ils ospitals, en las chasas da persunas attempadas e da tgira sco er tar ils servetschs da spitex. A medem temp ston vegnir remplazzadas fin l'onn 2020 var 60 000 persunas spezializadas che vegnan pensiunadas (30 pertschient). Da resguardar èsi er che la populaziun pli giuvna che 65 onns vegn a s'augmentar mo pauc ils proxims decennis. En consequenza da quai vegn a sa reducir la basa da recrutaziun per las professiuns d'assistenza e da tgira.

Da persunas che assistan confamigliars che basegnan tgira – cunzunt umans attempads e malsauns sco er umans cun impediments spiertals, corporals u psichics – na poi betg vegnir desisti sut l'aspect d'ina finanziaziun duraivla dal sistem da sanadad. Ma pervia da la midada da las structurass famigliaras sco er pervia da l'incompatibilitad tranter in'activitad da gudogn e la tgira da confamigliars daventa questa incumbensa pli e pli difficila.

Las analisas dal rapport dal cussegl federal menziunà mussan ch'i èn avant maun gia bleras propostas per sustegnair las persunas che assistan e tgiran lur confamigliars, ma ch'i dovra – en ils secturs dal sustegn professiunal e da la cumpatibilitad cun in'activitad da gudogn – sforzs supplementars per sustegnair e distgargiar persunas che assistan e tgiran lur confamigliars.

Er en il chantun Grischun han fatg differentas varts ils ultims onns differentes sforzs per megliar la situaziun. Uschia ha il chantun surdà a la Crusch cotschna dal Grischun l'incarica da prestaziun d'endrizzar in post d'infurmaziun e da cussegliaziun per persunas che tgiran lur confamigliars. Plinavant porscha la Crusch cotschna dal Grischun curs per accompagnadras ed accompagnaders da tgira voluntars. Tut questas iniziativas han la medema finamira. In basegn d'agir exista en il chantun Grischun dentant en spezial anc en il sector da la cumpatibilitad d'ina activitad da gudogn cun la tgira dals confamigliars. En il cussegl grond èn gia vegnidas inoltradas inqual intervenziuns che han pretendi meglieraziuns per la situaziun da las persunas che assistan e tgiran lur confamigliars. Per exempel la "incumbensa Cavigelli concernent la promoziun da las prestaziuns d'assistenza e da tgira che vegnan puschidas da confamigliaras e da confamigliars a favur da persunas che basegnan tgira" ch'è vegnida inoltrada durant la sessiun d'october 2006. Uschenavant ch'ellas èn in summa vegnidas realisadas, n'han las mesiras pretendidas dentant betg pudì megliar la situaziun.

Per ils motivs numnads incumbenseschan las sutsegnadras ed ils sutsegnaders la regenza d'elavurar – analogamain a la confederaziun – in "plan d'acziun per sustegnair e distgargiar persunas che assistan e tgiran lur confamigliars". La finamira dal plan d'acziun è quella da crear bunas cundiziuns generalas per persunas che assistan e tgiran lur confamigliars. Puschidas da sustegn e da distgargia adequatas duain permetter in engaschi duraivel da las persunas che assistan e tgiran lur confamigliars e sche pussaivel impedir che questas persunas èn surdumandadas entaifer lur famiglias. Sche persunas cun in'activitad da gudogn vulessan reducir temporarmain lur pensum da lavur u prender in congedi, duess quai esser pussaivel senza ch'ellas mettian en privel lur basa economica u lur carriera professiunala. Las mesiras dal plan d'acziun duain vegnir realisadas en il rom da la repartiziun existentia da las cumpetenzas tranter la confederaziun ed ils chantuns.

Cuira, ils 11 da favrer 2015

Caduff, Holzinger-Loretz, Albertin, Alig, Berther, Brandenburger, Buchli-Mannhart, Burkhardt, Caluori, Casanova (Glion), Casutt-Derungs, Cavegn, Caviezel (Tavau Clavadel), Crameri, Darms-Landolt, Della Vedova, Dosch, Engler, Epp, Felix (Scuol), Florin-Caluori, Gunzinger, Heiz, Hitz-Rusch, Kappeler, Kasper, Kunfermann, Kunz (Cuira), Mani-Heldstab, Märchy-Caduff, Mathis, Michael (Donat), Müller, Nay, Niederer, Niggli (Samedan), Niggli-Mathis (Grüsch), Noi-Togni, Paterlini, Sax, Schneider, Steck-Rauch, Stiffler (Tavau Plaz), Stiffler (Cuira), Tenchio, Thomann-Frank, Tomaschett (Breil), Tomaschett-Berther (Trun), von Ballmoos, Waidacher, Weber, Widmer-Spreiter, Wieland, Andri, Derungs, Föhn, Lauber, Lombardi, Stähler, Tuor